

番境補遺

杭州郁永河著

深山廣遠平地遼闊土番種類繁多不能盡悉惟紀所知者

玉山在萬山中其山獨高無遠不見巉巖峭削白色如銀遠望如太白積雪四面攢峰環繞可望不可即
皆言此山渾然美玉番人既不知寶外人又畏野番不敢向邇每遇晴霽時在郡城望之不啻天上白雲
也

銀山有礦產銀又有積鐵皆大錠不知何代所藏曾有兩人常入取之費用不竭前臺廈道王公名效命

家人挽牛車隨兩人行既至見積鐵如山恣取滿車迷不能出盡棄之乃得歸明日更率多人薙草開徑
而入步步標識方謂歸途無復迷理乃竟失故道尋之累日不達而返自此兩人者亦不能復入矣

哆囉滿產金淘沙出之與雲南瓜子金相似番人鑄成條藏巨甕中客至每開甕自炫然不知所用近歲
始有攜至雞籠淡水易布者

水沙廉雖在山中實輸貢賦其地四面高山中爲大湖湖中復起一山番人聚居山下非舟莫即番社形
勝無出其右自柴里社轉小徑過斗六門崎嶇而入阻大溪三重水深險無橋梁老藤橫跨溪上往來從
藤上行外人至輒股慄不敢前番人見慣不怖也其番善織罽毯染五色狗毛雜樹皮爲之陸離如錯錦
質亦細密四方人多欲購之常不可得番婦亦白哲妍好能勸稼穡人皆饒裕

斗尾龍岸番皆偉岸多力既盡文身復盡文面窮奇極怪狀同魔鬼常出外焚掠殺入土番聞其出者皆
號哭遠避鄭經親統三千眾往勦既深入不見一人時亭午酷暑將士皆渴競取所植甘蔗啖之劉國軒
守半綫率數百人後至見鄭經馬上啖蔗大呼曰誰使主君至此令後軍速退既而曰事急矣退亦莫及
令二軍速刈草爲營亂動者斬言未畢四面火發文面五六百人奮勇挑戰互有殺傷餘皆竄匿深山竟